



N° 7160  
Entrée le 11.11.2022  
Déclarée recevable  
Président de la Chambre des Députés  
(s.) Fernand Etgen  
Luxembourg, le 11.11.2022

Fernand ETGEN  
President vun der  
Chamber vun den Deputéierten  
19, um Krautmaart  
L-1728 Lëtzebuerg

Lëtzebuerg, den 11/11/2022

Här President,

**Sou wéi den Artikel 80 vun eisem Chambersreglement et virgesäit, bieden ech lech, dës parlamentaresch Fro un d'Ministère fir Öffentlechen Déngscht & Gesondheet weiderzeleeden.**

Tuberkulos ass eng bakteriell Erkrankung, déi an den heefegste Fäll d'Longe betrëfft. Si ass net héisch ustiechend, kann awer fir Risikogruppe geféierlech ginn. Mir ass zougedroe ginn, dass an eise Schoule momentan eng Réi vu Schüler a vum Léierpersonal sech mat dëser Krankheet infizéiert hunn.

An deem Zesammenhang wéilt ech de Ministeren dës Froe stellen:

1. Wei vill Fäll vun Tuberkulos sinn et an deene leschte 6 Méint ënnert de Schüler an dem Leierpersonal ginn?
2. Wéi solle Schoulen handelen, am Fall wou e Schüler oder eng Persoun vum Schoulpersonal un Tuberkulos erkrankt?
  - Wiem musse Fäll gemellt ginn?
  - Am Respekt vum Dateschutz, wien muss iwwert een Infektionsrisiko informéiert ginn?
  - Wat fir sanitär Mesurë soll d'Schoul eventuell huele fir eng weider Verbreedung ze verhënneren?
3. Bidden d'Ministèren hei Guidelines un, wéi d'Schoul mat Tuberkulos Fäll soll ëmgoen?
4. Wéi schaffe Schoulen a Ministèren an dëser Hisiicht zesammen?

Mat déiwem Respekt,

CLEMENT Sven  
Deputéierten





**Gemeinsam Äntwert vun der Madamm Gesondheetsministesch, Paulette Lenert, a vum Här Minister fir Educatioun, Kanner a Jugend, Claude Meisch, op d'parlamentaresch Fro Nr. 7160 vum honorabelen Deputéierten Här Sven Clement**

1. Wei vill Fäll vun Tuberkulos sinn et an deene leschte 6 Méint ënnert de Schüler an dem Leierpersonal ginn?

Et sinn insgesamt zwee Fäll vun ustiechender Tuberkulos an de leschte sechs Méint am Kader vun der Schoul/Maison relais gemellt ginn.

2. Wéi solle Schoulen handelen, am Fall wou e Schüler oder eng Persoun vum Schoulpersonal un Tuberkulos erkrankt?

Wiem musse Fäll gemellt ginn?

Am Respekt vum Dateschutz, wien muss iwwert een Infektiounsrisiko informéiert ginn?

Wat fir sanitär Mesurë soll d'Schoul eventuell huele fir eng weider Verbreedung ze verhënneren?

Tuberkulos ass eng meldeflichteg Krankheet. Se muss der Inspection sanitaire bannent enger Woch vum Laboratoire a vum Dokter gemellt ginn.

D'Inspection sanitaire mécht mat Hëllef vun der kranker Persoun eng Enquête fir ze kucken, wien alles als Kontaktpersoun a Fro kënnt. Mat Hëllef vun den Responsabele vun der Schoul/Maison relais kritt d'Inspection sanitaire d'Donnéeën. Si hëllef och, fir den Dépistage mat ze organisieren.

Informéiert ginn natierlech d'Kontaktpersounen selwer, datt si e Kontakt mat engem Fall haten. Wann e Fall an enger Schoul optrëtt, ginn déi concernéiert Leit zesumme mat der Schoul an der Maison relais identifizéiert a vun der Santé kontaktéiert.

D'Iwwerdroung vun der Tuberkulos geschitt iwwert d'Loft. De Mikrob ka länger Zäit an der Loft schwiewen, dofir kann eng gutt Beléftung vun de Raim en Iwwerdroe begrenzen, awer net ganz evitéieren. Tuberkulos ass ganz ustiechend, wann ee mat engem Kranken a Kontakt kënnt a wann dësen eng ustiechend Form huet. Am effikassten ass eng Fréierkennung vun der Erkrankung an och den Dépistage vun de latenten Tuberkulosen no engem Kontakt. (Et ass een infizéiert, awer nach net krank).

Fréier sinn d'Kanner regelméisseg an der Schoul getest ginn, mee well d'Tuberkulos bei eis net méi dacks virkënnt an déi meescht Fäll aus endemesche Gebitter importéiert ginn, ass domat opgehale ginn.

3. Bidden d'Ministèren hei Guidelines un, wéi d'Schoul mat Tuberkulos Fäll soll ëmgoen?

D'Fäll vun Tuberkulos, déi an der Schoul optrieden, si ganz seelen. Et ginn de Moment keng spezifesch national Guidelines fir d'Schoulen, mee d'Inspection sanitaire huet awer eng Prozedur fir den Dépistage vun Tuberkuloskontakter an der Populatioun.

Déi infizéiert Persoun selwer gëtt vun hirem Dokter an der Klinik esou laang behandelt, bis keen Ustiechungsrisiko méi besteet. D'Kontaktpersounen an der Schoul ginn entweder an der Schoul vun der Inspection sanitaire mat enger „autorisation parentale“ getest, oder si gi vun der Ligue médico-sociale

geruff, fir den Test bei hinnen ze maachen. Sollt e Kand sech ugestach hunn, géif et behandelt gi fir ze verhënneren, datt et un Tuberkulos erkrankt.

4. Wéi schaffe Schoulen a Ministère an dëser Hisiicht zesammen?

D'Inspection sanitaire kontaktéiert déi krank Persoun, fir mat hir ze retracéieren, wéi eng méiglech Kontakter bestanen hunn. Des Weidere gétt mat der Schoul e Contact-Tracing gemaach, fir en Dépistage an der Schoul oder an der Maison relais duerchzeféieren. D'Autoritéiten (Educatiounsministère a Gemengenautoritéiten) sinn och implizéiert, fir d'Kommunikatioun ze optimiséieren.

Lëtzebuerg, den 7. Dezember 2022

D'Gesondheitsministesch  
(s.) Paulette Lenert